

Parlamentu no governu tenke respeitu independensia judisiál no separasaun poder

Posted October 30, 2014 by jsmp

0



Ohin JSMP hala'o konferensia impresa hodi enkoraza Governu no Parlamentu Nasional hodi respeitu independensia judisiáru no seperasaun poder.

Ida ne'e nu'udar resposta ida ba rezulusaun ne'ebé hasai hosi Parlamentu Nasional no Governu foin lalais ne'e atu imediatamente termina kontratu ofisiál judisiál internasional, inklui juis, prokurador no defensor públíku sira.

"Rezulusaun sira ne'e viola prinsipi independensia judisiál no separasaun poder ne'ebé hatuur iha ita nian Konstitusaun," dehan Direitor Ezekutivu JSMP, Luis de Oliveira Sampaio.

La iha fatin ba Parlamentu Nasional ka governu atu hasai ofisiál judisiál liu hosi rezulusaun ida. Ida ne'e so bele halo tur lei. Hasai ofisiál judisiál arbitrariamente (arbiru) tantu internasional ka nasional, fó ameasa ba estadu de direitu no direitu sidadaun ba julgamento justu iha Timor-Leste.

Parlamentu Nasional pasa/aprova ona rezulusaun ne'e iha loron Sesta, 24 Outobru 2014 liuhosi sesaun plenaria ekstraordinariu Parlementu nasional ne'ebé taka ba públíku. Rezulusaun ida ne'e husu governu atu hala'o auditoria ba sistema judisiál iha Timor-Leste no atu imediatamente termina kontratu juis, prokurador, defensór no asesór internasional sira ne'ebé servisu iha sistema judisiáru. Rezulusaun governu nian ne'e adopta medidas sira ne'ebé ejize hosi Parlamentu Nasional.

JSMP preokupa teb-tebes kona-ba efeitu/impaktu hosi rezulusaun sira ne'e ba iha idependensia judisiáru iha Timor-Leste, noabilidade sistema justisa atu funsiona lor-loron.

Hasai autór judisiáru no asesór sira ho derepente deit sei interompe makas ba funzionamentu regular hosi tribunál sira no dezenvolvimentu sistema legal ne'ebé la'o hela iha Timor-Leste.

Rezulusaun ne'e kauza suspensaun ba formadór sira iha Sentru Formasaun Judisiáru. Ida ne'e sei iha konsekuensiā seriú ba juis, prokurador, defensór no advogadu sira iha futuru.

JSMP osbera katak sistema legal iha Timor-Leste sei dezenvolve an hela no número prosesu kazu iha tribunál aumenta. Tribunál presija rekursu tan hodi hala'o sira nia servisu ho efetivu. Rezulusaun ida ne'e hasai tiha rekursu importante sira hosi justisa ne'ebé frajil hela.

"JSMP fiar katak rezulusaun sira ne'e sei lori sistema justisa iha Timor-Leste ba kotuk no la'os ba interesse nasional Timor-Leste nian", dehan Luis de Oliveira Sampaio.

Preidente Tribunál Rekursu hasai diretiva ida ba juis administrador sira, ne'ebé hateten katak rezulusaun ne'e laiha efetu no tanba ne'e husu juiz ba internasional sira no funzionari tribunál atu kontinua sira nia funsaun.

JSMP ejize ba Parlamentu Nasional no Governu atu rekonsidera rezulusaun sira ne'e no imediatamente foti asaun appropriadu hodi garante independensia.

Leave a Comment

Name (required)

Name

Email (required)

Email

Website

Website

Comment